

Date – 16/02/2026
Time - 7:30 -7:40 Hrs
AKASHVANI AIPZAWL

REGIONAL NEWS BULLETIN

HEADLINES (MORNING)

1. Mizoram Universal Health Care Scheme (MUHCS) atana inziahlul theih hun chu vawiin atang hian hawn leh a ni ang.
2. Myanmar chung Salachhuah khua atanga bo Lawngtlai khaw mi Pu Lalramsanga ruang hmuh a nih hnu-ah CYLA chuan Myanmar ramri an khar dawn.
3. India-AI Impact Summit 2026 chu vawiinah New Delhi-a Bharat Mandapam-ah tan a ni dawn.
4. External Affairs Minister Dr.S.Jaishankar chuan Munich Security Conference Chairman Wolfgang Ischinger nen venhimna chungchangah an inkawm.

<><><>

MUHCS

Mizoram Universal Health Care Scheme (MUHCS) atana inziahlul theih hun chu vawiin atangin hawn leh a ni dawn, Health Minister Pi Lalrinpuii chuan mi zawng zawng inziak lut turin a sawm a ni.

Damloh nikhuaa mahni insengso lova inenkawlina atana Mizoram sorkarin a kalpui mek Mizoram Universal Health Care Scheme kal mek chu March ni 31-ah a tawp dawn tak avangin MUHCS thawh hnihna 2.0 atan mipui nawlpui, general beneficiaries te tana inziahlulna hun chu vawiin atang hian hawn a ni leh tan dawn a. MUHCS CEO Dr. Lalhriatzuali'n hemi chungchanga mipui hriat tur tul a sawina-ah tuna inziahlulna runpui hawn tur hi hi April ni 1 atanga hman tan tur a ni dawn thu a tarlang a. Inziahlul hun hi April ni 15 thleng hawn a ni dawn tih a sawi bawk. Inziahlulna hi online-a kalpui hmasak tur a ni a, mahni awmhmun atangin inziahlul theih a ni dawn a, online a inziak lut duh tan <http://muhcs.mizoram.gov.in/> hmanga inziahlul theih a ni dawn a ni.

A hmuna kal a inziahlul hun erawh March ni 1 atanga hawn tan tur niin online a inziahlul remchan lohna hmuna chauh a hmuna kala inziahlulna hi kalpui tura ruahman a ni a. Mipui mimir (general beneficiary)-te inziahlul man hi duhthlan tur chi 3 siam a ni a, cheng 2,500 man, cheng 5,000 man leh cheng 10,000 man te a ni ang. Cheng 2,500 a inziaklutte hi an dam lohin general ward-ah admit an ni anga, cheng 5,000 pete hi semi cabin leh leh singkhat pete hi cabin-ah an awm thei ang. Sorkar hnathawk, civil pensioner leh AB-PMJY Golden card hmang tu chungkaw tan general beneficiary hnuaiyah hian inziahlul hranpa a ngai ve dawn lo a ni. Inziahlul hun bituk hnulamah, inziahlul theih a nih thin tawh loh avangin mipuite'n ngai pawimawh a, inziahlul hun bituk chungah inziaklut theuh turin MUHCS CEO Dr. Lalhriatzuali chuan mitin a sawm a ni.

<><><>

PENSION

Chief Minister Pu Lalduhoma chuan an sorkar chhungin (First Formulation bikah) Pension chinfel tawh zat chu 25,038 a nih thu leh sorkar hmasa hun chhung khan pension case chinfel 974 a awm thu social media kaltlangin a tarlang.

Chief Minister chuan Pension hlawh siamthatna (First formulation - Revision of pension/family pension of Pre 2016 pensioners/family pensioners based on 7th Pay Commission) ah hma an lak nasat thu tarlangin, Pensioner leh an chhungte tam takin he pension hlawh punna hi an chhawr tawh a ni tih a sawi a. Hetiang taka hma sawn theihna chhan chu Directorate of Local Fund Audit & Pensions thawktute thawhrim vang niin, an chungah lawmthu a sawi a. An zarah an vanglai hun tha sorkar tana hmang raltu pensioner ten an pension pung an lak theih phah a ni, a ti.

<><><>

ASSEMBLY SESSION

Naktuk a Assembly budget session tan tur atan ruahmanna peihfel thawkhat a ni.

Assembly inkhawm tan ni, naktuk hian zing dar 10 leh a chanve-ah larsap Gen. Vijay Kumar Singh chu House chhungah lutin Hnam Hla rimawi tihrik chhungin House chhunga awmte an ding ang a. Larsap hian House chhungah thu sawiin sorkar hnathawh tawh, thawh mek leh hmabakte a tarlang ang. Larsap-in assembly a chhuahsan hnu hian kalkhawm lehin larsap thusawi chungah lawmthu sawina motion putluh a ni ang a. A tuk, Nilaini-ah sawiho-in a tlang kawm a ni ang. Tangka kum thar (2026-2027) atana Mizoram Budget chu February ni 26-ah Finance changtu Chief Minister Pu Lalduhoma'n a pharh ang a. A kar leh March ni 1 leh ni 2-ah a tlangpui a budget sawihona hun hman a ni ang a. A hnu lamah chuan minister-te'n an department chante enkawlina sum ruahman chu House pawmpui tura chhawp chhuakin sawiho chhoh a ni ang a. Assembly inkhawm hi March ni 16 thleng awh tura duan chhin a ni.

Assembly Secretariat atanga thu dawn danin tun thlengin Assembly rorelna a ngaihtuah tur dan thar siam tur pakhat leh dan dinglai siamthatna tur bill 3 a lut tawh a. Sawi hlawh tak Mizoram State University Act pawm tawh, a dinna hmun sawn a nih dawn avanga siamthat ngai chu thehluh a la ni lo ni a thu dawn a ni. Zawhna hi House chhunga chhan chi (starred question) 1,190 a lut tawh a, ziaka chhan chi (unstarred question) 384 a lut tawh bawk a ni.

<><><>

BORDER CLOSURE

Myanmar chhung Salachhuah khua atanga bo Lawngtlai khaw mi Pu Lalramsanga ruang hmuh a nih hnu-ah CYLA chuan Myanmar ramri an khar dawn.

Central Young Lai Association (CYLA) hruaitute'n Akashvani Aizawl News an hrilh danin Pu Lalramsanga ruang hi nimin tlai lam khan Chhimtuipui leh Salachhuah inkarah hmuh a ni a. He mi chungchang hi sawiho mek a ni chhungin ramri a insumdawn tawna hi khar rih an tum thu an sawi a ni. Pu Lalramsanga leh a nau Pu Lalthlamuana te hi an pick-up motor hmangin sumdawng bungrua phurin kar kalta Nilaini khan Salachhuah panin an kal a, khua hi a tuk Ningani khan thlengin hotel pakhatan an inngat a. Pu Lalramsanga hi hotel atanga a chhuak chu Ningani zan dar 9 atang khan a awmna chin hriat a ni ta lova. Nimin tlai khan a ruang hi hmuh a ni ta a ni.

CYLA hruaitute leh Mara thalai (MTP) general headquarters hruaitute chu Inrinni zan dar 7 leh a chanve khan Tuipui Ferry-ah inhmukhawmin he thil thleng chungchang hi an sawiho a. Pu Lalramsanga chanchin hi hriat chhuah ngei ni se tih an rel a. Myanmar ram chhunga awm Rakhine hel pawl Arakan Army-te pawh phone hmanga thu thawnin an awp ram chhunga thilthleng a nih avangin Pu Lalramsanga chanchin hre chiang tura an mawhpurhna hlen chhuak turin an hriattir tawh a. Nimin tlai dar 3 thlenga a chanchin hriat a nih loh chuan Lawngtlai leh Siaha district atanga sumdawngte Myanmar luh leh chhuahna kal khan zawng zawng dan a, sumdawng kal vel zawng zawng dan chah a nih tur thu an lo puang lawk tawh a ni.

<><><>

BIOMETRTIC ENROLMENT

Mizorama Myanmar raltlante kutze thla leh mitnaute hmanga chhinchhiahna hna thawh mek chu kar kalta chhung khan raltlan luh belh an awm lo chungin hmasawna a awm lo.

Home department atanga Akashvani Aizawl News-in thu a dawn danin Champhai leh Hnahthial district-ah raltlan an luh belh avangin raltlan hi an pung chho a. January thla chawlhkar hnukung ber khan mi 231 an rawn luh belh a, February thla chawlhkar hmasa ber chhung khan mi 137 an rawn luh belh leh bawk a. He tih lai hian chhuak an awm ve reng a. Zirtawpni thleng khan home department chhinchhiah dan chuan Myanmar raltlan hi Mizoramah mi 28,355 an awm mek a, an zinga mi 26,381 te chu an mitnaute leh kutze thla laksak hmanga chhinchhiah tawh an ni a. Chu chu za zela 93 point bial pali a ni. Aizawl, Lunglei, Champhai leh Serchhip district-ah te chuan raltlan awm zawng zawng chhinchhiah kim vek an ni tawh a. Raltlan awm tam berna dawttu Lawngtlai district-ah erawh chuan za zela 73 point bial pali chauh chhinchhiah an la ni a. District 5-ah chuan raltlan chhinchhiah hna hi hun engemaw chen kalpui zui lohin a awm niin a lang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

INDIA-AI IMPACT SUMMIT

India-AI Impact Summit 2026 chu vawiinah New Delhi-a Bharat Mandapam-ah tan a ni dawn. Ni nga chhung awh tur India-AI Impact Summit hi khawvel huap AI Summit Global South rama nghah a nih vawikhatna tur a nia . Khawvel ram hruaitu pawimawh tak tak an lo tel dawn a. Heng zingah hian France President Emmanuel Macorn, Brazil President Luiz Inacio Lula da Silva, Spain President Pedro Sanchez Perez-Castjon leh Switzerland President Guy Parmelin te an tel a. External Ministry thuchhuah danin Bolivia, Croatia, Estonia, Finland, Greece, Guyana, Kazakhstan, Liechtenstein, Serbia, leh Slovakia hruaitute pawh he Summit ah hian anlo tel bawk ang.

<><><>

EAM

External Affairs Minister Dr.S.Jaishankar chuan Munich Security Conference Chairman Wolfgang Ischinger nen Germany ah an inkawm. Social Media-a a tarlan danin Dr.Jaishankar-a chuan Munich Security Conference 2026 chuan venhimna lama ngaihda leh thirna hrang hrang sawihona hun remchang a siam a ti a. Dr. Jaishankar-a hian Romania Foreign Minister pawh Onana-Silva Toiu pawh kawmin India leh Romania inkara thawhdunna leh an theihna te nasa zawka hman an rel thu a tarlang a ni.

